

Date – 09/02/2026

Time - 7:30 -7:40 Hrs

AKASHVANI AIZAWL
REGIONAL NEWS BULLETIN
HEADLINES (MORNING)

1. Champhai Dist Khuangleng SSC atanga sawhthing lei tur company sorkarin a be fel.
2. Union Minister Sarbananda Sonowal an India leh Myanmar inkalpawhna tur Kaladan Multi-Modal Transit Transport Project chu nakum atangin hman tan a ni dawn a ti.
3. Prime Minister Narendra Modia chuan nimin khan Malaysia PM Anwar Ibrahim Kuala Lumpur ah India leh Malaysia chungchangah an inkawm.
4. Prime Minister Narendra Modia chuan vawiinah Seychelles President Dr. Patrick Herminie New Delhi ah a kawm dawn



GINGER MARKETING

Mizoram sorkar chuan sawhthing lei turin hma a la zel a, nimin tlai khan Mizoram Agriculture Marketing Board (MAMB) Pisa-ah Agriculture minister Pu PC Vanlalruata chuan Opickpure Organic Private Ltd. te hnen atangin sawhthing leina tur sum a dawng.

Opicpure te hian Sawhthing hi Khuangleng SCC atangin an lei tan dawn a, a bul tanna atan KG nuai 5 man tur cheng vaibelchhe 2 an hlan phawt a, sawhthing hi KG khat Rs 40 in an lei ang - Mizoram sorkar chuan support price a pe dawn a, KG khatah Rs 10 zelin a lo thlawp dawn tihna a ni.

Agriculture Minister Pu PC Vanlalruata chuan Sawhthing a hlawma lei duh lian zawkte nen an inbiak mek thu a sawi a, kuthnathawktu ten KG khat Rs 50 aia to a an lei theih dan tur an ngaihtuah zel tih sawiin, a tlawm berah pawh KG khat chu Rs 50 aia hniam in an hralh dawn lo tih a sawi bawk.

(Desk)



ADVISER TO CM

Adviser to Chief Minister (Agriculture) Dr Lorrain Lalpeklia Chinzah chuan Ngengpuikai-a Nul siamtute chu Sorkar hmalakna tha taka an tawiawm bakah mithiamte thurawn anga hna an thawk chu fakawm a tih thu a sawi.

Inrinni khan Lawngtlai District-a Ngengpuikai ah Nul siamtute tan Training buatsaih a hmanpuina ah Adviser to Chief Minister chuan Ngengpuikai-a Nul siamtute thawhrah chu Lawngtlai khawpuiin kum tam tak chhung an innghahna a ni tawh tih sawiin, mihring pung chho zelah Thlai tharchhuah pawh a pung zel tih sawiin Kuthnathawktuten tunlai thiamna hmanga hma an lak chu a pawimawh thu sawiin Ngengpuikaia Nul siamtute chu KVK Lawngtlai leh Horticulture Department ten theihtawp chhuaha hma an lakpui avanga hlawhtinna hmuh theiha a awm chu lawmawm a tih thu a sawi a, KVK leh Horticulture Department atanga Kuthnathawktute tanpui a sem nghal a ni.

Ngengpuikai a Nul siamtute chuan an Nul tih changtlun nan leh Sorkar hmalakna hlawk zawka an chhawr theih nan Tui pump khawl leh Kawlphetha, Leilehna tur hmanrua an mamawh thu Adiviser to CM hi an hrilha, Dr.Lorrain Lalpeklia Chinzah chuan an mamawh an thlente chu a theih anga lo bawhzui a tum thu a hrilh a ni.

(Lalnggheta Ralte PTC Lawngtlai)

<><><>

KMMTTP

Union Minister Sarbananda Sonowal chuan India leh Myanmar inkalpawhna tur Kaladan Multi-Modal Transit Transport Project (KMMTTP) chu kum 2027 atangin hman tan ani dawn tih a sawi.

Union Minister Guwahati-a chanchinbumite a kawmna ah he thu hi sawiin hmarchhak bial hmasawn nan sawrkar laipui chuan nasa takin hma a la a ti a, KMMTTP Kawngpui India leh Myanmar inkalpawhna chu kum 2027 ah hman tan ani dawn tih sawiin hei hian hmarchhak bial hrang hrang chu ramchhung hmun dangte nen awlsam zawka inpawhna a siam thei dawn a ti a, Aizawl leh Kolkata inkar pawh km 700 lain a tawi phah dawn tih sawiin hmasawanna lian tak a thlen dawn tih a sawi bawk.

Union Minister chuan Myanmar-a Sittwe lawng chawlhna hmun chu peih fel tawh ani a ti a, a pumpuia KMMTTP Project chu kum 2027 ah an peih fel vek dawn tih sawiin tuipui hmanga inkalpawhna hrang hranga hmasawanna a awm theih nan theihtawp chhuah a ni a ti a, hmarchhak bial chu ramchhunga eizawanna hnar pawimawh tak ani tih sawiin ramdang nena insumdawn tawanna kawng pawimawh tak ani tih a sawi.

(Corr)

<><><>

SUGAMYA BHARAT YOJANA

Rualbanlo te puala hamthatna sawrkar laipuiin a ruahman Sugamya Bharat Yojana hnuaiah Mizoram sawrkarin hmalakna hrang hrang a kalpui.

Rualbanlote tana hamthatna hrang hrang a awm theih nana sawrkar laipui ruahman chu Mizorama rualbanloten a hlawkna an chan ve theih nan hmalak zel a ni a, Social Welfare Department hotute sawi danin Mizoram rualbanlote tan disability pension department kaltlanga hamthatna pekchhuak thin a ni a ti a, a mamawh tan dilna hawn reng a ni a ti bawk.

Department hotute sawi danin Mizoram district dangah department kaltlangin mumal takin pension sem thin a ni an ti a, National Social Assistance programme hnuaiah sorkar laipui atangin rualbanlo pension hamthatna an dawng thei tih sawiin sorkar laipuia Ministry of Social Justice and empowerment hnuaia directorate te pawhin rualbanlo te puala hamthatna buaipuitu NGO te tan tanpuina a dil theih anih thu an sawi.

Department hotute chuan Unique Disability ID (UDID) chu rualbanlo ten hmthatna an dawn na tura neih ngei ngei tur thil a ni an ti a, hei hi rualbanlo chhungten ngaihven sak se an tih thu sawiin UDID nei tur chuan district hospital panpui phawt a, doctor ten an lo enfiah hnu ah Board in certificate a ziahsak theih reng a, Hamthatna dawng duh tan neih ngei ngei a ngaih thu an sawi a ni.

(Corr)

<><><>

ORGANIC FARMING

Mizoram ei leh bara intodelh tur leh kuthnathawktuten awlsam zawka thlai tharchhuah sa an hralh theih nana hma la tu Mission Organic Mizoram hnuaiah thlai tharchhuah tam tham tak ram pawnah thawh chhuah a ni.

Mission Organic Mizoram tarlan danin sawrkar kum kal ta ah Sawhthing Metric tonne 20, Hmarchate metric tonne 10, bakah Lakhuihthei metric tonne 4.2 chu rampawnah thawhchhuah a ni a, heng bakah hian Millenium Centre tualzawlah Pineapple Bonanza an buatsaih atangin lakhuihthei metric tonne 9 hralh a ni bawk.

Mission Organic Mizoram thawktute sawi danin kuminah pawh hmasawwna an hmuh chhunzawm zel a, thla liam ta January ah Lakhuihthei metric tonne 32 chu Guwahati ah thawhchhuah a ni an ti a, Mizo hmarcha metric tonne 4.5 pawh Tripura ah thawhchhuah niin Mizo hmarcha ro metric tonne 2.5 chu tualchhungah hralhchhuah ani an ti bawk.

Mission Organic Mizoram hnuaiah hian kuthnathawktu 27604 an inziak lut tawh a, hectare 26,500 ah thlai hrang hrang kuthnathawktuten an ching thin a, Mission Organic Mizoram hi kum 2016 khan Mizoramah bultan niin an thawhpui Service Provider te nen Mizoram District hrang hrangah kuthnathawktute hmasawn nan hna an thawk thin a ni.

(Corr)

<><><>

SIAHA HIV/AIDS

Siaha District ah kum 2003 January thla atang December 2025 inkarah HIV hrik kai 1048 hmuhchhuah an ni.

Integrated Counselling and Testing Centre (ICTC), Chief Medical Office a chhinchhiah danin Siaha ah kum 22 chhungin HIV/AIDS vei mi 1048 awm in, heng

zinga 176 hi nau pai lai an ni a, Kum 2003 January atanga December 2025 thleng khan HIV tana test 27564 niin an zing ah hian rai lai hi 16946 an ni.

District thuneitute chuan HIV hri kai tena damdawi an ei thin ART chu hri vei ten ei tha tura chahin mi tin te mahni dinhmun hriat chian a pawimawh thu an sawi a ni.

(CZ Hluna PTC Siaha)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan nimin khan Malaysia PM Anwar Ibrahimen Kuala Lumpur ah India leh Malaysia chungchangah an inkawm a. Politics, ralthuam leh ram venhimna, sumdawnna leh sum peipunna lamahte ram pahnih thawhdunna tih hmasawn dan tur an sawi a. Heng bakah hian Digital Economy, energy, zirna, tourism leh an chhehvel buaina hrang hrang te an sawidun bawk a ni.

Pu Modia hian Malaysia a cham chhung hian thawhdunna tur chi 16 ah inremna a siam pui thei a. Heng zingah hian khuarel chhiatna thlen thulha chet lakna turte, audiovisual productiion, eirukna do leh semiconductor te pawh a tel a ni.

PM Modia chuan ram phnihte chuan thu pawimawh inhrilh tawnkawngah tun aia nasa zawka thawhdun an rel a ti a. Hei bakah hian tuipui lama venhimna hna thawh leh firfiakte do kawngah chak zawka thawhdun an rel a ti bawk.

(Newsonair)

<><><>

SEYCHILLES

Prime Minister Narendra Modia chuan vawiinah Seychelles President Dr. Patrick Herminie New Delhi ah a kawm dawn a. Hruaitu pahnihte hian India leh Seychilles inkara thawhdunna hrang hrang, sumdawnna leh khawvel thilthleng pawimawh te an sawidun dawn ani. President Herminie hian India a cham chhungin President Droupadi Murmu-i a hmu dawn bawk a. Ni 6 cham turin Presdient Herminie hian nimin khan India a lo thleng a ni.

(Newsonair)

<><><>